

# Adroddiad Ymchwiliad Craffu Gorfodaeth Stryd

## **Aelodau'r Ymchwiliad**

Y Cynghorydd Annwen Daniels (Cadeirydd)

Y Cynghorydd Angela Russell

Y Cynghorydd Mike Stevens

Y Cynghorydd Dilwyn Morgan

Y Cynghorydd Annwen Hughes

Y Cynghorydd Tudor Owen

## **Swyddogion**

Arwel E Jones (Swyddog Arweiniol)

Peter Simpson (Rheolwr Gwasanaethau Stryd)

Lowri Evans (Swyddog Cefnogol)

Cyngor Gwynedd

Stryd y Jêl,

Caernarfon,

Gwynedd

LL55 1SH

Medi 2016

## Cynnwys

<b>Yr Adroddiad</b>	<b>Tudalen</b>
1. Cyd-destun	3
2. Pwrpas yr Ymchwiliad Craffu	4
3. Prif Weithgaredd yr Ymchwiliad	4
4. Prif Ganfyddiadau ac Argymhellion yr Ymchwiliad	6
<b>Yr Atodiadau</b>	
Atodiad 1 – Strwythur Staffio y Gwasanaeth Gwasanaethau Stryd (ar ddechrau gwaith yr Ymchwiliad)	12
Atodiad 2 – Amlinelliad o'r cwestiynau a ofynnwyd i gynrychiolwyr o gynghorau eraill	14
Atodiad 3 – Amlinelliad o'r cwestiynau a ofynnwyd i gynrychiolwyr cwmni darparu preifat sydd yn gweithio yn y maes	15
Atodiad 4 - Amlinelliad o'r cwestiynau a ofynnwyd i Heddlu Gogledd Cymru am eu cyfrifoldebau gorfodi a phlisma yn y mae glendid strydoedd	16
Atodiad 5 – Ffurflen holi a ddefnyddiwyd gydag aelodau'r Panel Trigolion a Chynghorau Cymuned o fewn y sir	17
Atodiad 6 - Arolwg APSE - Symudiad tuag at uno gweithgareddau gorfodi amgylcheddol i un maes gwasanaeth	19
Atodiad 7 – Amlinelliad o'r ymatebion a dderbyniwyd i'r cwestiynau yn Atodiad 5	25
Atodiad 8 – Atebion a ddarparwyd gan yr Heddlu mewn ymateb i gwestiynau am eu mewnbwn i ddelio â throseddau amgylcheddol	i ddilyn

## 1. Cyd-destun

- 1.1 Mae ansawdd yr amgylchedd leol a glendid stryd yn un o'r ffactorau sydd o'r consyrn mwyaf i drigolion. Ym mhob arolwg barn cyhoeddus, mae glendid ar y strydoedd yn dod ymysg y materion mwyaf pwysig sydd yn dod i'r brig o ran bodlonrwydd trigolion am yr ardal y maent yn byw ynddynt a hefyd bodlonrwydd â gwasanaethau'r Cyngor. Mae'r Cyngor wedi cydnabod hyn yn y gorffennol trwy brosiectau fel "Amgylchedd o Ansawdd" a thrwy sefydlu'r Gwasanaeth Gorfodaeth Stryd. Ar ben hynny, mae nifer o fesuryddion yn y maes yn cael sylw yng Nghynllun Strategol y Cyngor.
- 1.2 Gofynnodd y Pwyllgor Craffu Cymunedau am adroddiad gan yr Aelod Cabinet ar y mater y Mai 2015. Penderfyniad y pwyllgor oedd bod y mater angen cael blaenoriaeth uwch yn rhaglen waith y pwyllgor ac felly y dylid comisiynu ymchwiliad craffu i'r maes gan flaenoriaethu'r gwaith hynny dros feysydd eraill oedd wedi eu hadnabod fel meysydd ar gyfer ymchwiliadau posib. Derbyniodd y pwyllgor y briff ar gyfer gwaith yr ymchwiliad yn ei gyfarfod ym Medi, 2015 a dechreuodd ar ei waith yn Nhachwedd, 2015.
- 1.3 Mae'r Gwasanaeth Gorfodaeth Stryd yn dîm cymharol fechan o 8 o bobl yn gweithio o fewn cyllideb net a oedd, ar ddechrau'r Ymchwiliad, yn £300,150. Fodd bynnag, yn ystod cyfnod gwaith yr Ymchwiliad, gwnaed penderfyniadau, fel rhan o broses Her Gwynedd, a oedd yn golygu bod y gyllideb yn lleihau o £64,500 yn ystod 2016/17
- 1.4 Mae'r tîm yn gyfrifol am godi ymwybyddiaeth ac addysgu'r cyhoedd i sicrhau amgylchedd lan a diogel, y Fenter Trefi Taclus, gweithredu polisïau ar graffiti, nodwyddau a lanteri, monitro perfformiad glendid strydoedd a chynnal a chynorthwyo mewn ystod o ymgyrchoedd perthnasol. Mae copi o Strwythur Staffio'r Uned ar ddechrau gwaith yr Ymchwiliad ynghlwm fel Atodiad 1a i'r adroddiad hwn. Newidiodd y sefyllfa yn ystod yr Ymchwiliad o ganlyniad i benderfyniadau Her Gwynedd, fel y sonnir ym mharagraff 4.2 ac yng nghanfyddiad rhif 3 o dan paragraff 4.9. Mae'r strwythur diwygiedig felly yn cael ei ddangos yn Atodiad 1b.
- 1.5 Mae gan y Gwasanaeth Stryd gyfrifoldeb am sicrhau gorfodaeth stryd a cyflwyno gwastraff yn cynnwys:-
  - rheoli cŵn, sbwriel, graffiti a phosteri
  - gwaredu slei bach, cyflwyno gwastraff, gwastraff masnachwyr, trosglwyddo gwastraff a dyletswyddau gofal

Mae'r tim yn ysgwyddo baich gwaith arwyddocaol sydd o ddiddordeb mawr i'r cyhoedd. Yn ystod blwyddyn ariannol, 2015/16, cyfeiriodd Galw Gwynedd 1,775 o alwadau i'r Tim Gorfodaeth Stryd ar faterion amrywiol yn gynnwys troseddau gwastraff, camddefnydd o finiau, tipio slei bach, rheoli cŵn, ceisiadau am finiau stryd, biniau baw cŵn, graffiti a phosteri anghyfreithlon a nodwyddau. Mae hyn ar ben y 1,522 o alwadau yn y maes a gafodd eu cyfeirio yn uniongyrchol i'r Uned Waith.

- 1.6 Mae gan y Gwasanaeth allu i gosbi trwy roddi dirwyon parod am droseddau amgylcheddol o dan amryw o ddarpariaethau statudol gwahanol. Fodd bynnag, dengys cyfrifon yr uned bod yr incwm a dderbyniwyd o ddirwyon dros y tair blynedd diwethaf wedi bod oddeutu £5,300 y flwyddyn, yn erbyn targed incwm yn y Llyfr Cyllideb o £18,500 ar gyfer y tîm ac eraill sydd â hawliau gorfodi yn y maes.
- 1.7 Mae'n bwysig nodi bod yr hyn y mae'r Gwasanaeth yn ei wneud yn y maes yn ddarostyngedig i amrywiaeth o ddeddfwriaethau. Ers ei sefydlu yn 2008, mae'r uned wedi bod yn gweithredu yn bennaf o dan y Ddeddf Diogelu'r Amgylchedd 1990 a'r Ddeddf Cymdogaethau Glan a'r Amgylchedd 2005. Fodd bynnag, o 2016 ymlaen, bydd hefyd yn gweithredu o dan y Ddeddf Ymddygiad Gwrthgymdeithasol, Trosedd a Phlisma 2014.

## **2. Pwrpas yr Ymchwiliad Craffu**

- 2.1 Cytunodd y Pwyllgor Craffu i'r sgôp ar gyfer yr Ymchwiliad a oedd yn nodi'r canlynol:-

Nodwyd y byddai'r Ymchwiliad yn ceisio, yn y lle cyntaf sefydlu dealltwriaeth ynglŷn â:-

- Beth yw'r disgwyliadau a'r gofynion statudol ynghlwm â'r gwasanaeth
- Beth yw'r perfformiad presennol o safbwynt allbynnau gorfodaeth
- Beth yw lefel yr adnoddau sydd ar gael ar gyfer gorfodi

Byddai'r Ymchwiliad wedyn yn ceisio ateb y cwestiynau a ganlyn:-

- Pa bosibiliadau eraill sydd ar gael i gynorthwyo mewn gorfodi e.e. heddlu
- Pa bosibiliadau eraill sydd ar gael o ran defnyddio cwmni/au pwrpasol i roddi hysbysiadau cosbau penodedig (fel sy'n weithredol mewn rhai siroedd eraill).


- 2.2 Roedd yr Ymchwiliad yn anelu at lunio argymhellion clir ar sail tystiolaeth er ystyriaeth gan yr Aelod Cabinet a rhoi ystyriaeth briodol i unrhyw rwystrau a sut i'w datrys.

## **3. Prif Weithgaredd yr Ymchwiliad**

- 3.1 Cyfarfu'r Ymchwiliad gyda'r Aelod Cabinet, y Pennaeth Gwasanaeth a'r Rheolwr Gwasanaethau Stryd i gytuno ar raglen waith fanwl y gweithredwyd arno dros 11 o gyfarfodydd. Yn ogystal cyfrannodd Rheolwr y Gwasanaeth yn gyson at waith yr Ymchwiliad a bu trafodaethau achlysurol gyda'r Aelod Cabinet a'r Pennaeth Gwasanaeth yn ystod y gwaith.

- 3.2 Derbyniodd yr Ymchwiliad wybodaeth hynod ddefnyddiol am berfformiad y gwasanaeth yng Ngwynedd o gymharu ag ardaloedd eraill. Roedd y wybodaeth hynny'n dangos bod y perfformiad cymharol o ran glendid strydoedd yn weddol gadarnhaol, er engraifft gyda Gwynedd yn cael sgôr glendid o 71.7 o'i gymharu â 67.9 ar draws Cymru a hefyd â 67.8 yng Ngwynedd yn y flwyddyn flaenorol.

% o briffyrdd a thir perthnasol sydd o safon glanweithdra uchel neu dderbyniol  
 % of highways and relevant land of a high or acceptable standard of cleanliness



*Arolwg annibynnol Cadwch Cymru'n Daclus / Keep Wales Tidy's independent survey*

- 3.3 Treuliodd aelodau'r Ymchwiliad amser yn cysgodi gwaith y swyddogion yn y maes yn ardaloedd Bangor a'r Bala er mwyn gweld natur y gwaith y maent yn ymgymryd ag ef ar lawr gwlad.
- 3.4 Daeth yn amlwg i'r Ymchwiliad yn fuan iawn bod y maes yn un sydd yn cael sylw gan nifer o gynghorau a'i fod yn bwysig dysgu o brofiadau eraill. Felly, cafwyd trafodaethau gyda chynrychiolwyr o Gynghorau Dinbych a Wrecsam a hefyd gydag arbenigwr maes o'r "Association of Public Service Excellence" oedd newydd gwblhau arolwg o sut y mae cynghorau trwy'r Deyrnas Gyfunol yn dygymod â'r her o ddarparu gwasanaethau o'r fath ar adeg pan mae adnoddau yn crebachu. (Mae copïau o'r cwestiynau a ofynnwyd wrth gynrychiolwyr y cynghorau eraill ynghlwm fel Atodiad 2)
- 3.5 Bu'r Ymchwiliad hefyd yn edrych ar y ffaith bod amrywiaeth eang o hawliau gorfodi gan y Cyngor ar draws y gwasanaethau gwahanol ac amryw o swyddogion gwahanol yn gweithredu'r hawliau hynny ar draws y sir. Cynhaliwyd trafodaethau gyda swyddogion sydd yn gyfrifol am weithredu ar rai o'r hawliau hynny er mwyn gwyntyllu a oes lle i resymoli'r defnyddio hawliau gorfodi.
- 3.6 O waith ymchwil i atebion cynghorau eraill, daeth yn amlwg bod nifer bellach yn allanoli elfennau o'r gwaith hynny i gwmni preifat a cafwyd cyfarfod gyda chynrychiolwyr cwmni darparu preifat sydd yn gweithredu yn y maes ar ran rai cynghorau eraill yng Ngogledd Cymru. (Mae copïau o'r cwestiynau a ofynnwyd wrth gynrychiolwyr y gwasanaeth arall ynghlwm fel Atodiad 3)

- 3.7 Gofynnwyd cwestiynau hefyd i gynrychiolydd o Heddlu Gogledd Cymru er mwyn ceisio sefydlu lefel ymrwymiad Heddlu Gogledd Cymru i fod yn rhan o fwriadau'r Cyngor i fynd i'r afael â throseddau amgylcheddol. (Mae copïau o'r cwestiynau a ofynnwyd wrth yr Heddlu ynghlwm fel Atodiad 4)
- 3.8 Cynhaliwyd ymgynghoriad gydag aelodau Panel Trigolion a hefyd gyda chynghorau cymuned o fewn y sir i geisio eu barn bellach ar bwysigrwydd gweithredu ym maes gorfodaeth yn ogystal â'u hymateb pe byddai'r Cyngor yn ymagweddu'n fwy cadarn yn erbyn troseddau o'r fath. (Mae copi o'r ffurflenni ar gyfer yr holiadur ynghlwm fel Atodiad 5)

#### **4. Prif Ganfyddiadau'r Ymchwiliad**

- 4.1 Mae'r Ymchwiliad wedi ystyried y gwasanaeth yn weddol eang ac yn cydnabod ei bwysigrwydd i ymdeimlad o les yn y gymuned, yn cynnwys lles economaidd. Mae hefyd wedi adnabod y gwasanaeth fel un gwerthfawr ond sydd o dan bwysau i ymateb i ofynion a disgwyliadau uchel. Felly, beth bynnag y mae'r Cyngor wedi ei gyflawni a heb ei gyflawni yn y gorffennol, mae'n amserol bod yr Ymchwiliad wedi cymryd stoc gan fod angen rhoi sylw penodol er mwyn gwella eto i'r dyfodol.
- 4.2 Ar ben hynny, mae'r Gwasanaeth wedi gorfod dygymod â thoriadau diweddar sydd wedi golygu na all y Gwasanaeth barhau i weithredu fel y mae wedi bod. Felly, mae angen ail-edrych ar y defnydd o'r adnoddau sy'n weddill ac ystyried atebion eraill ar gyfer elfennau o'r gwaith.
- 4.3. Mae'n rhaid cael cydweithrediad trigolion er mwyn cael strydoedd glân. Mae'r Gwasanaeth wedi cyflwyno rhai ymgyrchoedd i newid ymddygiad yn y gorffennol ac wedi cael peth llwyddiant gyda'r ymgyrchoedd hynny. Fodd bynnag, mae'r gofyn yn fawr a'r adnoddau ar gyfer cyfarch hynny yn mynd yn brinnach. Felly, mae'n gwbl allweddol bod ffocws clir ar godi ymwybyddiaeth a newid ymddygiad yng ngwaith y Gwasanaeth i'r dyfodol.
- 4.4 Mae'r Ymchwiliad wedi adnabod y ffaith bod gan y Cyngor adnoddau gorfodi mewn amryw o feysydd ar draws yr adrannau gwahanol; diau fod pob un o'r timau hyn o dan bwysau. O dderbyn her Ffordd Gwynedd i edrych ar y pwnc o bersbectif y cwsmer, mae'n rhaid i'r Cyngor feddwl am ddefnyddio'r adnoddau hynny mewn ffordd fwy hyblyg. Mae hyn yn fater y mae'r Association of Public Service Excellence (APSE) wedi edrych arno'n ddiweddar, fel y gwelir yn Atodiad 6. Mae hwn, mae'n debyg, yn bwnc allai gymryd ychydig mwy o amser i'w wireddu, gan y gallai olygu newid strwythurol, ond mae'n haeddu sylw gan y gallasai arwain at well defnydd o adnoddau prin ar draws y sir.
- 4.5 Mae'r Cyngor wedi cael peth llwyddiant yn cydweithio gyda gwirfoddolwyr ar ymgyrchoedd penodol yn y gorffennol, fel Balchder Bangor, Balchder Bro Dyffryn Ogwen a Felin Daclus. Fodd bynnag, mae rhai yn rhwystredig nad ydym wedi llwyddo i fanteisio yn llawn ar yr awydd a'r parodrwydd ymysg rhai i wirfoddoli yn y maes. Mae gwaith yr Ymchwiliad wedi ei wneud yn glir bod lle i fanteisio'n llawnach ar barodrwydd gwirfoddolwyr ond mae'n rhaid defnyddio'r

egni hynny yn y ffordd iawn, heb roi gwirfoddolwyr mewn sefyllfaoedd nad ydynt yn gymwys i ddelio â hwy.

- 4.6 Mae nifer o enghreifftiau o ardaloedd eraill o gynghorau yn manteisio ar y ffaith bod awydd ymysg busnesau a chwmnïau i fod yn dangos eu cydwybod cymdeithasol trwy gefnogi mentrau lleol. Byddai menter o'r fath yn fwyaf addas ar gyfer rhywbeth sydd ynghlwm â gwaith gwirfoddolwyr a rhaid edrych ar hynny.
- 4.7 Wrth ail-flaenoriaethu sylw y tîm mewnol, cred yr Ymchwiliad bod lle i arbrofi o leiaf gyda threfniadau fyddai'n dod â chwmni allanol i mewn i ysgwyddo peth o'r gwaith gorfodi. Y nôd fyddai cyfarch y diffyg incwm o ddirwyon i raddau a hefyd yn profi'r graddau y gall agwedd mwy cadarn yn gwella llif incwm y gwasanaeth a hefyd greu argraff ar lendid stryd yn gyffredinol o fewn y sir. Mae gwaith ymchwil a wnaed gan yr Ymchwiliad wedi dangos bod awydd clir ymysg y cyhoedd a chynghorau cymuned i'r Cyngor gymryd agwedd mwy caled at droseddau amgylcheddol a symud i drefniadau caletach ar gyfer dirwyo. Mae'r argymhellion isod yn cynnwys camau i wneud hynny gan gynnwys argymhelliad penodol i godi ymwybyddiaeth am y newid sydd ar y gweill fel bod trigolion yn barod ar gyfer y newid.
- 4.8 Wrth gwrs, nid y Cyngor yn unig sydd â chyfrifoldebau yn y maes a bydd cyfraniadau partneriaid eraill fel yr Heddlu yn bwysig iawn yn y dyfodol os ydym am ddefnyddio'r holl adnoddau cyhoeddus i wella perfformiad yn y maes.
- 4.9 Nodir prif ganfyddiadau'r Ymchwiliad isod gyda nodyn o'r dystiolaeth y tu cefn i'r canfyddiad hwnnw ac wedyn yr argymhelliad a wna'r Ymchwiliad yn ei ddilyn.

<b>1. Pwysigrwydd y Maes</b>
<b>Canfyddiadau</b> - Mae glendid stryd o'r pwysigrwydd mwyaf ar gyfer yr economi, iechyd ac ymdeimlad o les yn ein cymunedau ac mae dyletswyddau pendant ar y Cyngor yn y maes y mae'n rhaid eu hwynebu. Mae arolwg ymysg y Panel Trigolion a chynghorau cymuned wedi dangos yn eglur iawn bod gan bobl Gwynedd ddymuniad i'r Cyngor weithredu'n fwy caled yn y maes hwn.
<b>Tystiolaeth –</b> <ul style="list-style-type: none"><li>• Tystiolaeth Cadwch Cymru'n Daclus a'r Association of Public Service Excellence (APSE) bod glendid stryd yn ffactor eithriadol o bwysig wrth i drigolion ddod i farn am eu hardal</li><li>• Cadarnhad o hynny yn lleol mewn gwaith Arolwg Barn oedd yn dangos bod glendid stryd ymysg y ddau neu dri ffactor pwysicaf oedd yn dylanwadu ar farn trigolion am yr ardal</li></ul>
<b>Argymhelliad i'r Aelod Cabinet –</b> <p>Argymhellir bod yr Aelod Cabinet yn derbyn bod yn rhaid cymryd camau gwella pendant a newydd ac yn cadarnhau ei ymrwymiad i flaenoriaethu'r maes hwn ac yn ymrwymo i sicrhau blaenoriaeth i'r maes mewn trafodaethau o fewn Cabinet Cyngor Gwynedd</p>

<b>2. Natur y Gwasanaeth Presennol</b>
<b>Canfyddiadau</b> - Mae'r gwasanaeth a ddarparir gan yr Uned yn un hynod o werthfawr; mae'r tîm yn ymroddedig ac yn gweithredu'n galed iawn mewn maes anodd a diddiolch i fynd i'r afael ag un o feysydd gwaith pwysicaf y Cyngor
<b>Tystiolaeth</b> –
<ul style="list-style-type: none"> <li>• Tystiolaeth aelodau'r Ymchwiliad o dreulio amser gydag aelodau o'r Tîm Gorfodaeth Stryd wrth eu gwaith o ddydd i ddydd</li> <li>• Tystiolaeth o lwyddiant ymgyrchoedd ymyrraeth benodol gan y tîm mewn ardaloedd lleol</li> </ul>
<b>Argymhelliad i'r Aelod Cabinet</b> –
Argymhellir bod yr Aelod Cabinet yn cyfleu gwerthfawrogiad yr Ymchwiliad o waith y tîm.

<b>3. Her Arbedion y Cyngor</b>
<b>Canfyddiadau</b> – Mae'r Cyngor wedi gorfod cyflwyno rhai toriadau yn y gwasanaeth fel rhan o becyn toriadau Her Gwynedd ac mae hyn yn sicr o effeithio ar gapasiti'r tîm i weithredu
<b>Tystiolaeth</b> –
<ul style="list-style-type: none"> <li>• Yr Uned wedi gorfod dygymod â thoriad o £64,500 yn sgil penderfyniadau'r Cyngor ar 3 Mawrth, 2016 i gymeradwyo pecyn o doriadau angenrheidiol, sydd wedi arwain at leihad o 2 swydd mewn tîm cymharol fychan o saith</li> </ul>
<b>Argymhelliad i'r Aelod Cabinet</b> –
Argymhellir bod yr Aelod Cabinet yn ymateb i'r lleihad yng nghapasiti'r Uned, yn derbyn yr her o edrych eto ar y gwasanaeth ac yn edrych yn greadigol ar atebion newydd wrth ail-flaenoriaethu gwaith y tîm.

<b>4. Codi Ymwybyddiaeth a Newid Ymddygiad</b>
<b>Canfyddiadau</b> – Mae pwyslais y tîm ar godi ymwybyddiaeth a cheisio newid ymddygiad yn allweddol ac mae'n bwysig nad yw'r gwaith hynny yn dioddef yn sgil y toriadau
<b>Tystiolaeth</b> –
<ul style="list-style-type: none"> <li>• Cadarnhad o waith APSE o bwysigrwydd gwaith codi ymwybyddiaeth a newid ymddygiad</li> <li>• Tystiolaeth leol, trwy waith yr uned (gyda chymorth grant Trefi Taclus) o</li> </ul>



lwyddiant ymgyrchoedd lleol i newid ymddygiad
<p><b>Argymhelliad i'r Aelod Cabinet –</b></p> <p>Argymhellir i'r Aelod Cabinet bod y gwaith ar godi ymwybyddiaeth yn gorfod parhau wrth ail-edrych ar ddyletswyddau'r Uned wrth ddygymod â'r toriadau y maent yn gorfod eu hwynebu</p> <p>Argymhellir hefyd, yn benodol, bod angen ymgyrch codi ymwybyddiaeth ffres, trwyadl a phenodol am gyfnod o oddeutu 6 mis cyn cyflwyno unrhyw drefn newydd sydd yn dangos bod agwedd y Cyngor at orfodi yn y maes hwn yn mynd i galedu (gweler Canfyddiad 8 isod).</p>

<p><b>5. Cydweithio rhyngadrannol</b></p> <p><b>Canfyddiadau –</b> Mae'r gwahanol gyfrifoldebau gorfodi ar draws y Cyngor yn amrywiol iawn ac mae lle i edrych yn y tymor hwy ar resymoli rhai ohonynt er mwyn rhannu hawliau gorfodi ar draws nifer fwy o staff a gwneud gwell defnydd o'r swyddogion ar lawr gwlad</p> <p><b>Tystiolaeth –</b></p> <ul style="list-style-type: none"> <li>• Cyfweiliadau gyda'r gwasanaeth a gwasanaethau eraill ar draws y Cyngor wedi amlygu bod gan y Cyngor lawer o swyddogion sydd yn ymwneud â gorfodi mewn llawer o feysydd ar draws y Cyngor a bod posibilrwydd o wneud gwell defnydd o'r adnoddau hynny ar adeg pan mae adnoddau yn brin</li> <li>• Tystiolaeth gan APSE bod 36.5% o gynghorau wedi cyfuno hawliau gorfodi yn y maes a bod 40% o'r gweddill yn ystyried hynny ar hyn o bryd (Gweler Atodiad 6)</li> </ul> <p><b>Argymhelliad i'r Aelod Cabinet –</b></p> <p>Argymhellir bod yr Aelod Cabinet a'r Pennaeth Gwasanaeth yn cyd-drafod â'u cydweithwyr er mwyn ymestyn hawliau ac ymarferion gorfodi ar draws mwy o wasanaethau er mwyn gwneud gwell defnydd o adnoddau staff. Wrth wneud hynny dylai'r Aelod Cabinet a'r adrannau roi sylw i waith ymchwil diweddar APSE am y manteision posib a'r risgiau</p>
--

<p><b>6. Rôl Gwirfoddolwyr</b></p> <p><b>Canfyddiadau -</b> Tra nad oes rôl i wirfoddolwyr mewn gwaith gorfodi, mae lle i fanteisio ar awydd yn ein cymunedau i gymryd cyfrifoldeb am lendid ar ein strydoedd trwy gyflwyno pencampwyr gwirfoddol ("Tîm Gwynedd Daclus / Gwynedd Lân") sydd yn medru codi ymwybyddiaeth a chynnig cyngor a chymorth ac adnabod manau lle mae problemau</p> <p><b>Tystiolaeth –</b></p> <ul style="list-style-type: none"> <li>• Enghreifftiau o awydd a brwdfrydedd mewn cymunedau ar draws y sir i weithredu yn y maes</li> </ul>
--

- Tystiolaeth gan APSE bod modd manteisio ar y brwdfrydedd hynny ond mewn rhai meysydd yn unig oherwydd rhai elfennau risg fyddai ynghlwm â'r gwaith

#### **Argymhelliad i'r Aelod Cabinet –**

Argymhellir bod yr Aelod Cabinet yn agor trafodaethau gyda grwpiau a chymunedau lleol i weld sut y gellir datblygu pecyn o weithgareddau y gallai grwpiau felly weithredu arnynt , gan roi sylw i'r gwaith hynny yn benodol yn ystod y cyfnod paratoi ar gyfer y drefn newydd

### **7. Cyfraniad gan Fusnesau**

**Canfyddiadau** - Mae lle i ddenu cymorth a nawdd gan fusnesau preifat ar gyfer y gwaith hwn trwy eu cysylltu gyda'r datblygiad gwirfoddol a awgrymir yn Canfyddiad 6

#### **Tystiolaeth –**

- Enghreifftiau o fentrau o ardaloedd eraill, fel “Tidy Towns Ireland”

#### **Argymhelliad i'r Aelod Cabinet –**

Argymhellir bod yr Aelod Cabinet yn cydweithio gyda'r Aelod Cabinet â chyfrifoldeb dros yr Economi a Thwristiaeth i ddatblygu cysylltiadau gyda busnesau lleol i geisio nawdd tuag at fentrau gwirfoddol a chymunedol.

### **8. Gwaith Gorfodi**

#### **Canfyddiadau –**

- a) Dylai'r Cyngor edrych ar allanoli elfennau o'i waith gorfodi i ategu gwaith y tîm mewnol. Byddai'r gwaith hynny yn canolbwyntio ar orfodaeth a dirwyo sydyn (FPNs) ar sail dim cost i'r Cyngor (Dylid treialu hyn am gyfnod o 12 mis yn y lle cyntaf gan ei adolygu ar ôl hynny).
- b) Bydd angen pwysleisio rhai elfennau – ee rhaid i'r holl staff fedru siarad Cymraeg, cyflogaeth leol a'r angen i roi sylw i wahanol fathau o sbwriel a baw cŵn – fel y mae Cyngor Wrecsam wedi gwneud
- c) Bydd angen sicrhau cydweithrediad Uned Gyfathrebu'r Cyngor i roi cyhoeddusrwydd digonol i'r newid hwn mewn da bryd cyn iddo fod yn weithredol

#### **Tystiolaeth –**

- Gwybodaeth bod cyfraddau incwm yr uned yn gymharol isel
- Tystiolaeth o effaith gadarnhaol allanoli gwaith gorfodi mewn siroedd eraill
- Tystiolaeth gan y Panel Trigolion bod 83.82% o 1224 o drigolion a ymatebodd i holiadur ar-lein ac arolwg ffôn a 95% o'r 40 o Gynghorau

Cymuned a ymatebodd yn dweud eu bod yn dymuno i'r Cyngor weithredu'n galed trwy drefn o ddirwyon yn y fan a'r lle DS Er bod mwyafrif y cyhoedd (51.63%) a'r Cynghorau Cymuned (55%) o'i blaidd, roedd peth pryder ymysg y cyhoedd a'r Cynghorau Cymuned am y syniad o gwmni allanol yn ymgymryd â'r gwaith oherwydd pryderon am iaith y gwasanaeth, cost posib a diffyg swyddi i bobl leol

(Manylion llawnach am yr atebion i'w gweld yn Atodiad 7)

#### **Argymhelliad i'r Aelod Cabinet –**

Argymhellir bod yr Aelod Cabinet a'r Pennaeth Gwasanaeth yn:-

- a) cychwyn proses gystadleuol i gynnal treial di-gost i'r Cyngor o allanoli elfennau gorfodi am gyfnod o rhwng 12 a 24 mis gyda rhai amodau penodol, yn cynnwys sicrwydd am y defnydd o'r iaith Gymraeg yn y gwasanaeth, cyflogaeth leol a ffocws benodol ar ddelio â phroblem baw cwn
- b) adolygu llwyddiant yr arbrawf wedi'r cyfnod peilot ac yna ystyried y dewisiadau wedi hynny, boed hynny yn barhad efo'r gwasanaeth wedi ei allanoli neu, hyd yn oed, fewnoli'r gwasanaeth
- c) cwblhau gwaith penodol i baratoi'r cyhoedd ar gyfer y pwyslais newydd yn y gwaith trwy godi ymwybyddiaeth a nodi bod y Cyngor yn gwneud hyn mewn ymateb i farn clir y cyhoedd.

#### **9. Cyd-weithio gyda'r Heddlu**

**Canfyddiadau** – Mae cyfrifoldebau deddfwriaethol ar Heddlu Gogledd Cymru yn ogystal ag awdurdodau lleol. Fodd bynnag, dros y blynyddoedd diwethaf, mae Heddlu Gogledd Cymru wedi rhoi blaenoriaeth uwch i wahanol fathau o droseddau

#### **Tystiolaeth –**

- Atebion gan yr Heddlu i gwestiynau a anfonwyd atynt gan yr Ymchwiliad i'w gynnwys yn Atodiad 8 ond heb ei dderbyn eto)

#### **Argymhelliad i'r Aelod Cabinet –**

Argymhellir i'r Aelod Cabinet ei fod yn cynnal trafodaethau buan gyda Chomisiynydd yr Heddlu er mwyn trafod os oes lle i gydweithio yn agosach ar droseddau amgylcheddol ac ymddygiad gwrthgymdeithasol, yn cynnwys cydweithio ar weithredu'r Ddeddf Ymddygiad Gwrthgymdeithasol, Trosedd a Phlisma 2014.